

Ho etsa tseko ya ditshenyehelo tsa ofisi ya lapeng

SARS E ELETSA BALEFALEKGETHO KA BONNGWE BA BONA HO ELA HLOKO DITSEKO DIFE KAPA DIFE TSA DITSHENEYEHELO TSA OFISI YA LAPENG PELE BA TLATSA DIKGUTLISO TSA BONA TSA LEKGETHO LA LEKENO

Tshwane, 1 Phupu 2021 – SARS moraonyana tjena e phatlaladitse tse ntjhantjha websaeteng ya yona tse mabapi le ditshenyehelo tsa ofisi ya lapeng. Sepheo ka polelo ena ke ho fana ka tlhakisetso bakeng sa molefalekgetho e mong le e mong eo ka mohlomong a ntseng a lohotha ho etsa ditseko tsa ditshenyehelo tsa ofisi ya lapeng dikgutlisong tsa bona tsa lekgetho la lekeno tseo jwale di ka faelwang bakeng sa selemo sa lekgetho sa 2021.

Ho a utlwahala hore ka lebaka la tshusumetso ya COVID-19, ho na le palo e itseng ya batho bao nako ya bona e kgolo ba e qetang ba sebeletsa malapeng a bona.

Ha o ntse o nahana tsa ho etsa tseko e mabapi le ditshenyehelo tsena tse amamang le sena, ho bohlokwa ho ela sedi tse latelang:

1. Ha ho diphetoho tse entsweng mabapi le molao o mabapi le "ofisi ya lapeng". Ditlhoko tsa molao di ntse di tshwana le tsa pele ho sewa sena sa COVID-19. Ka bokgutshwane sena se bolela hore:
 - Ofisi, e nang le disebediswa tse loketseng, e tlameha hore e be e le teng bodulong ba mantlha;
 - Ofisi ena e tlameha hore e be e ile ya sebediswa kgafetsa le ka ho qolleha bakeng sa tsa mosebetsi;
 - Ofisi ena e tlameha hore 50% kapa ho feta mona e be e ile ya sebedisetswa ho phetha tshebetso ya mosebetsi kapa, ebang mosebetsi a fumana ho feta 50% ya moputso wa hae ho tswa khomisheneng kapa ditefong tse ding tse fapafapanang ka lebaka la mosebetsi o etswang, boholo bo fetang 50% ba tshebetso ya mosebetsi bo tlameha hore bo be bo phethwa hole le ofisi ya monga mosebetsi;
 - Ditshenyehelo dife kapa dife tsa ofisi ya lapeng di tlameha ho amana le tsa phethahatso ya mosebetsi mme di lokela ho ka netefatswa; mme

- Ditshenyehelo tsa ofisi ya lapeng di tlameha ho tsekwa kgahlano le khoutu ya mohlodi ya 4028 kgutlisong ya lekgetho la lekeno.
2. Moo e leng hore ofisi ena ya lapeng e bodulong boo e leng ba molefalekgetho, balefalekgetho ba lokela ho hlokomela hore ka ho hlalosa ka molao hore karolo e itseng ya bodulo ke ofisi ya lapeng, sena se ka nna sa baka kgahlamelo e mpe ha ho sebetsanwa le tsa kuno ya tjhelete kamoso. Sebaka sa lapeng seo ho thweng ke ofisi se tla sebetswa ho latela palohare e itseng mme se arohanngwe le bodulo ba mantlha ba R2 million nakong eo ho etswang tlohelo ya bodulo. Kahoo batho ba lokela ho ela sena hloko pele ba etsa tseko ya ditshenyehelo tsa ofisi ya lapeng. Balefalekgetho ba ka nna ba fumana hore ho sebeletsa lapeng ho ba boloketse ditshenyehelo tseo ka mohlomong ba ka beng ba bile le tsona, tse kang ditjeo tsa dipalangwang, ho tsofala ha dipalangwang, jwalo jwalo. Ha ho nkuwa tsena mmoho le tahlehelo ya karolo ya kuno ya tjhelete, dipoloko tsena di ka qetella di feta molemo wa tseko ya ditshenyehelo tsa ofisi ya lapeng.
 3. Le ha ditseko tsohle tsa ditshenyehelo tsa ofisi ya lapeng di ka angwa ke netefatso e nngwe hape kapa oditi ka SARS, ho bohlokwa ho hlokomela hore ho na le kgonahalo e kgolo ya hore molefalekgetho ya etsang ditseko tsa ditshenyehelo tsa ofisi ya lapeng lekgetho la pele, o tla kgethelwa netefatso kapa oditi.

Khomishenara ya SARS, Edward Kieswetter o itse: *“Tlhokeho ya hore basebetsi ba sebeletse malapeng a bona e bakilwe ke sewa sa COVID-19 mme ke ntho e sokang e etsahala pejana. Re a utlwisisa hore bongata ba beng ba mesebetsi le basebetsi ka ho tshwana ba tjamelane le taba ena ya ho itlwaetsa boemo bona bo botjha. Re batla ho lemosa balefalekgetho hore ba hlokomele ditlamorao tsa nako e telele tsa ho hlalosa sebaka se itseng bodulong ba bona ba mantlha e le se mabapi le ofisi ya lapeng bakeng sa tsa lekgetho. E ka nna ya ba bohlale hore motho a ke a eme pele mme o fumane morethetho wa nako e telele pele a etsa qeto ena”.*

Polelo ena ha e nke sebaka sa se ngotsweng pehelong ya Molao wa Lekgetho la Lekenno, 1962, kapa tataiso e websaeteng ya SARS. Balefalekgetho ba hlokanngwa thuso e nngwe ba ka etela websaete ya rona e leng www.sars.gov.za.

Ho fumana lesedi le fetang lena, ikopanye le SarsMedia@sars.gov.za